

## Evening Dogri News Bulletin, 24 July 2024

इवनिंग डोगरी न्यूज़ बुलेटिन

समे-18:15 Hrs

### HEADLINES

- 1 गृह राज्यमंत्री नित्यानंद राय होंरें दस्सेया ऐ जे इस बरे जून तगर 1 करोड़ 8 लक्ख सैलानियें जम्मू-कश्मीर दी यात्रा कीती ऐ।
- 2 उत्तरी कश्मीर दे कुपवाड़ा जिले च रात भर चले दे टाकरे च इक बे-पंछानू आतंकवादी मारेआ गेआ ऐ ते इक जवान शहीद होई गेआ ऐ।
- 3 उपराज्यपाल मनोज सिन्हा होंरें आखेआ ऐ जे केंद्र शासित प्रदेश च स्थिति किश म्हीनें दे अंदर-अंदर सामान्य होई जाग।
- 4 मुख सचिव अटल डुल्लू होंरें नमें बनाए गेदे मेडिकल कालजें च आई.सी.यू वार्डा कायम करने ते सेहत खेत्तर च औने आहली मुख परियोजनाएं दी समीक्षा कीती।

<><><><><><>

### Tourism-JK

जम्मू-कश्मीर थवां दफा 370 गी हटाए जाने मगरा सैलसफा क्षेत्र च बड़ा मता बाद्दा विकास दिक्खने गी लब्बा ऐ। पिछले 2 बरें च 2 करोड़ 11 लक्ख सैलानिएं केंद्र शासित प्रदेश दा दौरा लाया ऐ जिसले कि इस बरे जून तगर इक्क करोड़ 8 लक्ख सैलानिएं जम्मू-कश्मीर दी यात्रा कीती। राज्यसभा च प्रश्नकाल दौरान गृह राज्यमंत्री नित्यानंद राय होंरें एह जानकारी दित्ती। उनें आखेआ जे नरेंद्र मोदी हुंदी अगुवाई आहली सरकार नै आतंकवाद गी दना बी नेई बर्दाश्त करने आली नीति अपनाई दी ऐ। हाल च गै 28 आतंकवादिएं दा सफाया कीता गेआ। उनें दस्सेया जे 2004 थवां 2014 तगर 7 ज्हार 217 आतंकवादी घटनां पेश आइयां जिसले कि 2014 थवां इस बरे जून तगर नेइयां 2 ज्हार 200 घटनां होइयां न। केंद्र शासित प्रदेश च विकास बारे गल्ल करदे होई राय होंरें आखेआ जे जम्मू-कश्मीर च 15 मंत्रालयें दी 58 ज्हार 477 करोड़ रपे दी लागत आली 53 विकास परियोजनाएं गी चलाया जा'रदा ऐ जिंदे च 35 पूरी होई चुकी दियां न यां फ्ही पूरियां होने आह्लियां न। उनें दस्सेया जे इंदे च बिजली, सेहत, शिक्षा, सैलसफा ते कौशल विकास जनेहू क्षेत्रें सनें केई परियोजनां शामिल न। राय होंरें दस्सेया जे एम्स, आई.आई.टी, आई.आई.एम ते काजीगुंड बनिहाल आहले प्रोजेक्टें कन्नै नमें युग दी शुरूआत होई ऐ।

<><><><><><>

### Kupwara-Encounter

उत्तरी कश्मीर दे कुपवाड़ा जिले च रात भर चले दे टाकरे च इक बेपंछानू आतंकवादी मारेआ गेआ ते इक जवान शहीद होई गेआ ऐ। अधिकारी मुजब सेना ते पुलस नै कुपवाड़ा दे लोलाब लाहके च आतंकवाद रोधी अभियान किश दिन पैहले चलाया हा। एह अभियान लाहके च आतंकवादिएं दी गतिविधिएं बारै थ्होई दी जानकारी दे चले चलाया गेआ। कल छप्पे दे आतंकवादिएं ते सुरक्षाबलें बश्कार टाकरा भखेया। लाहके बारै थ्होई दी टकोदी सूह पर कार्रवाई करदे होई सेना ते पुलस आस्सेया 23 जुलाई गी तपाशी अभियान चलाया गेआ। कल संदिग्ध गतिविधि दिक्खी गेई ते सुरक्षाबलें आस्सेआ चुनौती बी दित्ती गेई पर आतंकवादिएं आस्सेआ गोलीबारी कीती गेई जेदे मगरा टाकरा भखी पेआ ते एह अभियान अजें जारी ऐ।

<><><><><><>

## LG-Situation JK

उप-राज्यपाल मनोज सिन्हा होरें आखेआ ऐ जे केंद्र शासित प्रदेश च स्थिति किश म्हीनें अंदर-अंदर सामान्य होई जाग ते एहदे लेई शरारती तत्वें गी बनकदा परता दित्ता जाग। उपराज्यपाल होरें आखेआ जे जेडे लोक इत्थुआं दे शांतिपूर्ण माहौल गी नेई पचाई सका रदे न, उनेंगी अपने खात्मे लेई त्यार रौहना लोडचदा। लोकें आस्सेआ ऐसे भैडे तत्वें गी पैहले बी सबक सखाया गेआ ऐ। उनें आखेआ जे किश म्हीनें च स्थिति सामान्य होई जाग। एहू गल्ल उनें श्रीनगर च पत्रकारें कन्नै गल्ल करदे होई आक्खी। जम्मू खित्ते च पिछले किश म्हीनें च आतंकवाद सरबंधी हिंसक घटनाएं च बाद्दा होआ ऐ। उपराज्यपाल होरें केंद्रीय बजट दा सौआगत कीता ते इसी ऐतिहासिक करार दित्ता। उनें प्रधानमंत्री ते खजाना मंत्री हुंदा इस ऐतिहासिक बजट लेई धन्नवाद कीता। उनें आखेआ जे एहू बजट विकसित भारत ते विकसित जम्मू-कश्मीर लेई बी मजबूत नीहू साबित होग।

<><><><><><>

## LG-Marathon

उपराज्यपाल मनोज सिन्हा होरें 20 अक्तूबर गी श्रीनगर च होने आली मैराथन लेई लोगो ते वेबसाइट जारी कीती। जम्मू-कश्मीर सैलसफा मैहकमे आस्सेआ इस मैराथन दा सरिस्ता कीता जाग। 20 अक्तूबर गी 22 किलोमीटर ते 20 किलोमीटर दी मैराथन श्रीनगर च आयोजित कीती जाग। उपराज्यपाल होरें मैराथन बारे बोलदे होई आखेआ जे एहू बक्खरे किस्मै दी मैराथन होग। उनें आखेआ जे इस मैराथन च नां छडे घाटी दे लोक हिस्सा लैडन सगुआं मुख भरै थ्वां आए दे लोक शामिल होडन। उनें आखेआ।

<><><><><><>

## Div-Com MMJHS

जम्मू दे डिविजनल कमिशनर रमेश कुमार होरें जेडे मुबारकमंडी जम्मू विरासती सोसायटी दी एग्जीक्यूटिव काउंसिल दे चेररमैन बी हैन, होरें इक बैठक लाई। बैठक च मुबारक मंडी दी परानी शान बहाल करने, उसी सौआरने बारे सरबंधी पैहलुएं पर चर्चा होई। इस दौरान एहू जानकारी दित्ती गई जे दरबार हाल, डोगरा अजैबघर ते रानी ते महल दे संरक्षण आला कम्म 75 फीसद सबूरा होई गेआ ऐ। डिवकाम होरें जम्मू-कश्मीर ढांचागत विकास सरबंधी माली कार्पोरेशन लिमिटेड आस्सेया चलाए जा'रदे कम्मै दी रफ्तार गी बढ़ाने लेई आखेआ। उनें मुबारक मंडी आले कैफे गी चालू करने लेई मुतल्लका अधिकारिणं गी हिदायतां दित्तियां। इस दौरान मुबारकमंडी परिसर च शुरू कीती जाई सकने आली गतिविधिणं ते परियोजनाएं दा पता लाने लेई माहिर एजेंसी गी जिम्मेदारी देने बारै चर्चा होई।

<><><><><><>

## ESI-Employees

इस बश्रे दे मई म्हीने च कर्मचारियें दी राज्य बीमा स्कीम तैहत 23 लक्ख थमां बढ़ नमें कम्मगारें दा पंजीकरण कीता गेआ ऐ। श्रम ते रोजगार मंत्रालय नै आखेआ ऐ जे तकरीबन 23 लक्ख कर्मचारियें चां 11 लक्ख शां मते कम्मगार 25एं बरें तोहड़ी दी उम्मी दे न। मंत्रालय नै आखेआ ऐ जे मई म्हीने च महिलाएं दा नामांकन दर्ज कीता गेआ हा। ओहू 4 लक्ख 47 ज्हार हा।

<><><><><><>

## Undia-UK

ब्रिटेन दे विदेश मंत्री डेविड लैमी दऊं दिनें दी आधिकारिक यात्रा पर अज्ज भारत पुज्जी गे'न। विदेश मंत्रालय दे प्रवक्ता रणधीर प्रवक्ता रणधीर जयसवाल होरें नमीं दिल्ली च उंदा सौआगत कीता। डेविड लैमी हुंदे इस दौरै दरान मुख तौरा पर व्यापक व्यापक रणनीतिक सांझेदारी ते भारत-ब्रिटेन बश्कार बपार समझौते गी मजबूत करने बारै गल्लबात करंगन। ब्रिटिश

प्रधानमंत्री Keir Starmer हुंदी लेबर पार्टी दी सरकार दे गठन दे मगरां लंदन थमां एह पेहला ते उच्च सतह आहला प्रतिनिधिमंडल ऐ। सचिव डेविड लैमी अज्ज संज्ञा विदेश मंत्री एस. जयशंकर हुंदे कन्नै बी मलाटी करंगन।

<><><><><><>

### CS-ICUs

मुख्य सचिव अटल डुल्लू होरें कल केंद्र शासित प्रदेश च नमें बनाए गेदे मेडिकल कॉलेज च आई.सी.यू वार्डों कायम करने दे कम्मकाज दी समीक्षा करने आस्तै इक बैठक दी अध्यक्षता कीती। बैठक दौरान मुख्य सचिव होरें मेडिकल कॉलेज च दिती जा' रदी सेवाएं दा बी जायजा लैता। मुख्य सचिव होरें इनें सेहत संस्थानें च शुरू कीते गेदे बक्ख-बक्ख चाल्ली दे टैस्टें ते डाक्टरें आस्सेआ उपलब्ध सुविधाएं बारै बी पुच्छ-गिच्छ कीती। उनें जोर भरियै अस्पतालें ते प्रिंसीपलें गी आखेआ जे सब्भनें सुविधाएं दा दर्जा बदान तां जे मरीजें गी एह सुविधा हासल करने आस्तै कुतै बाहर नेई जाना पवै। अटल डुल्लू होरें सब्भनें सरबंधत मैहकमें गी निर्देश दिते न जे ओह इक बेहतररीन माहिरें दा पैनल बनान तां जे एह पता लाया जाई सकै जे इनें मेडिकल कॉलेजें च इनें संसाधनें दा इस्तेमाल सेही ढंग्गै नै कीता जाई सकै।

<><><><><><>

### LS- Budget Discussion

लोकसभा च अज्ज बजट पर चर्चा शुरू होई गई ऐ। सदन च बरे 2024-25 आस्तै केंद्र शासित प्रदेश जम्मू-कश्मीर दे बजट पर बी चर्चा होआ'रदी ऐ। चर्चा दी शुरूआत करदे होई कांग्रेस दी कुमारी शैलजा नै बेरोजगारी दा मुद्दा पुट्टे होई आखेआ ऐ जे देशे च बेरोजगारी बढ़दी जा रदी ऐ। उनें सुआल पुट्टेया ऐ जे सरकार केंद्रें दे मैहकमें च खाली थाहरें गी भरने आस्तै कम्म की नेई करा रदे। कांग्रेस नेता नै हरियाणा च बी बेरोजगारी दा मुद्दा पुट्टेया। उनें अग्निवीर योजना पर बी सरकार दी नुक्ताचीनी कीती। चर्चा अजे जारी ऐ।

<><><><><><>

### Govt. Cancer Medicine

सरकार नै कैंसर दी दवाई पर सीमा शुल्क च छूट देने दा फैसला लैता ऐ। खजाना मंत्री निर्मला सीतारमण होरें कल संसद च आम बजट च कैंसर दी त्रऊं दवाइयें पर सीमा शुल्क च छूट देने दा फैसला लैता ऐ। इनें दवाइयें च स्तन कैंसर आस्तै फेफड़े दे कैंसर आस्तै ते पित्त ते फेफड़ें दे कैंसर आस्तै दवाइयां शामिल ना। सेहत मैहकमे नै दस्सेया ऐ जे देशे च 27 लक्ख मरीजें गी एहदे नै लाह हासल होगा। मंत्रालय नै इब्बी दस्सेया ऐ जे एक्स-रे ट्यूबें ते फ्लैट पैनल डिक्टेटरें पर बी सीमा शुल्क च छूट देने दा फैसला लैता ऐ।

<><><><><><>

### Meghwal-Budget

कनून ते न्या सरबंधी मंत्री अर्जुन राम मेघवाल होरें आखेआ ऐ जे प्रस्तावित केंद्री बजट 2024-25 कन्नै समाज दे हर तबके गी लाह पजाइये विकसित भारत दी बत्त पदरी होगा। अज्ज नमीं दिल्ली च इक वेबिनार गी संबोधित करदे होई मेघवाल होरें इस गल्लै पर जोर भरेया ऐ जे इस बजट गी विकसित भारत 2047 दे नजरिये कन्नै दिक्खेआ जाना लोडचदा, जेदा मकसद सब्भनें गी असानी कन्नै ते समें उप्पर न्यां पजाना ऐ। उनें आखेआ ऐ जे वेबिनार च न्या सरबंधी बुनियादी ढांचे ते बजट दे बक्ख-बक्ख पैहलुएं पर गल्लबात कीती गई। मंत्री होरें आखेआ ऐ जे खजाना मंत्री निर्मला सीतारमण हुंदे आस्सेआ पेश कीते गेदे इस बजट राहें सब्भनें दा सांज्ञा विकास यकीनी बनोगा।

<><><><><><>

## Railway-Recruitment

भारतीय रेलवे आस्सेआ 2014 थमां लेइयै अज्ज तक्कर पंज लक्ख शां मतियां भर्तियां कीत्तियां गोइयां ना। एह गल्ल रेलवे मंत्री अश्विनी वैष्णव होरें लोकसभा च इक लिखित परते च आक्खी। उनें आखेआ जे पिछले दस्सें बरें च कीती गोदी भर्ती दे मकाबले यू.पी.ए दे कार्जकाल दौरान 2004 थमां 2014 तोहडी 4 लक्ख 11 ज्हार भर्ती कीती गोई ही। मंत्री होरें दस्सेया ऐ जे रेलवे नै इस बरे लेई बक्ख-बक्ख चाल्ली दियां भर्तियां करने आस्तै इक सालाना कलंडर छापने जारी कीता जाग। उनें अगो आखेआ ऐ जे बरे जनवरी थमां मार्च दौरान टेक्नीशियन सब इंस्पेक्टर ते कांस्टेबल दे पदें गी भरने आस्तै 32 ज्हार शां मती भर्तियां कडियां गोइयां हियां। मंत्री होरें दस्सेया जे 2020 थमां 2022 बरे दे बश्कार रेलवे च तकरीबन 1 लक्ख 30 ज्हार 581 मेदवारें दी भर्ती कीती गोई ऐ। लोको पायलटें दे कम्मकाज दी स्थिति ते रेल गड्डियें सरबंधी बवस्था दी सुरक्षा स्थिति बारै श्री वैष्णव होरें आखेआ ऐ जे सुधारें लेई मतियां सारियां गैं पुट्टियां गोइयां ना।

<><><><><><>

## Swacchta-Pakhwada

जम्मू-कश्मीर आस्सेआ पैहली अगस्त थवां 15 अगस्त 2024 दौरान स्वच्छता पखवाडा दा आयोजन कीता जाग। इस दौरान साफ-सफाई ते स्वच्छता सरबंधी गतिविधिं च लोके दी शमूलियत पर बी ध्यान दिता जाग। उपराज्यपाल मनोज सिन्हा हुंदी हिरायदतें मुजब ग्रामीण विकास ते पंचैती राज मैहकमे आस्सेआ बक्ख-बक्ख मैहकमें ते जिला प्रशासन कन्नै रलिए स्वच्छता ते साफ-सफाई सरबंधी प्रोग्रामें दी योजना बनाई गोई ऐ। ग्रामीण विकास ते पंचैती राज मैहकमे दे सचिव डॉ. शाहिद इकबाल चौधरी होरें बैठक दौरान जिला ते ब्लॉक सतह दे अफसरें कन्नै गतिविधिं बारे व्यापक चर्चा कीती। 2 हफ्ते लम्में कार्यक्रम च बक्ख-बक्ख सतहें पर केई गतिविधियां लोके दी शमूलियत कन्नै चलाइयां जाडन।

<><><><><><>

## KP-SSRER

कश्मीरी विस्थापितें दी चुनावी प्रक्रिया च शमूलियत यकीनी बनाने लेई खास शिविरें दा ओजन कीता गेआ। एह शिविर बक्ख-बक्ख थाहरें जिंदे च गुरुग्राम, फरीदाबाद, नोएडा, गाजियाबाद, न्यू दिल्ली, देहरादून, चंडीगढ, पुने, हैदराबाद ते मुम्बई च लगगे। 8 अफसरें ते 16 अधिकारिएं दी इक टीम कायम कीती गोई ही।

<><><><><><>